

# Pū te Rongo

---

Tēnei Wiki i Nehe

---

# Ngā Ihirangi

Tēnei Wiki i Nehe



Image courtesy of Alexander Turnbull Library Ref: 1/2-029794; F

## Pānui 1:

Te Rā o Waitangi –  
He Hararei Noa?



Image courtesy of Wikipedia.

## Pānui 2:

Te Papa Tongarewa

## Pānui 3:

Te Wahine Māori  
Tuatahi i Pāremata

## Pānui 4:

Ranginui Walker –  
He Rangatira

## Pānui 5:

Te Kara i Kororāreka!

## Pānui 6:

Te Haki o Te  
Whakaminenga o  
ngā Hapū o Niu Tīreni

## Pānui 7:

Ngā Pī Miere

## Pānui 8:

E Mōhio Ana Rānei Koe  
ki te Whakapapa o  
Whakaata Māori?

## Pānui 9:

Tēnei Wiki i Ngā Tau o  
Mua: Te Hokinga Mai o  
Te Hokowhitu-a-Tū ki  
Aotearoa

# Tēnei Wiki i Nehe: Te Rā o Waitangi – He Hararei Noa?

## Panui 1

He rā whakatā ā-ture te tuaono o Pēpuere i Aotearoa, ā, e kīia ana ko Te Rā o Waitangi. He rangi whakanui tēnei i te hainatanga o Te Tiriti o Waitangi e ngā tangata whai o Ingarangi me te iwi Māori i te tau 1840.

Ko te iwi Māori ngā tangata tuatahi i noho ki Aotearoa, heoi, nō ngā tau 1830 i piki ake ai te tokomaha o ngā tangata whai nō Ingarangi i tatū mai ki tēnei whenua.

I aua wā rā, karekau he kāwanatanga, karekau he pirihimana, karekau rānei he ture i Aotearoa, ka mutu, ka mahi ngā tangata whai i tā rātou i hiahia ai. Nā tēnei i pīrangitia ai tētahi rangapū i waenganui i a rātou me te iwi Māori.

I hainatia te Tiriti o Waitangi i te tuaono o Pēpuere, i te tau 1840, engari nō te tau 1974 rā anō i mana ai hei hararei ā-motu.

*I mōhio  
rānei  
koe?*

I tuhia e ngā rangatira o te Karauna tētahi kawenata kia tau ai te noho a te iwi Māori me ngā tāngata whai, ā, ka tapaina te kawenata nei ko Te Tiriti o Waitangi.

Ahakoa i waihangahia tēnei tiriti i runga i te whakaaro pai, i kitea ūna raru i muri tata i tōna hainatanga – mātāmua rā ko ngā rerekētanga i waenganui i te kape Māori me te kape Pākehā. E tohea tonutia ana ēnei rerekētanga i tēnei rā tonu.

Ahakoa kāore ngā kupu o Te Tiriti o Waitangi i whai mana mō ngā tau maha, kua tīmata tā te Karauna whakamana i ētahi o ūna oati.

Ki te pīrangitia ētahi atu kōrero mō Te Tiriti o Waitangi, tēnā, mātakina te kiriata [‘The Big Problem with the Treaty of Waitangi’](#).

Queen Elizabeth, Prince Charles, The Duke Of Edinburgh, And Prime Minister Norman Kirk At Waitangi On 6 February 1974.



# Te Papa Tongarewa – He Waka Huia



## Panui 2

I whakatuwherahia te whare taonga o Te Papa Tongarewa, te whare taonga nui rawa atu o Aotearoa, i te 14 o Huitanguru, i te tau 1988, ki Te Whanganui-a-Tara.

Kua whakaaro rānei koe ki te tikanga o te ingoa o te whare taonga nei?

He kupu te ‘tongarewa’ mō te taonga. Ko te tikanga o ‘Te Papa Tongarewa’, ko tētahi waka huia e tiaki ana i ngā taonga.

Ka whā tau te roa o te hanga i te whare nei, e ono ūna papa, e 36,000 mita pūrua te rahi o te papa hīkoikoi. He rite tōna rahi ki ngā papa whutupōro e toru! Mēnā ka rū te whenua, kaua e māharahara, ka tū toka a Te Papa. Ka pēnei tana tū nā te mea kua whakapakaritia ūna pakitara me tōna papa ki te maitai!

E rima ngā kohinga motuhake o te whare taonga nei: ko te Toi, ko te Hītori, ko ngā taonga Māori, ko te Ahurea Pasifika, me te Hītori o te Ao Tūroa.

Ko ētahi o ngā whakaaturanga ka whakaaturia i Te Papa e hāngai pū ana ki a koutou ngā tamariki. Nō reira, mēnā koutou ko tō whānau ka haere ki Te Whanganui-a-Tara me tae atu ki Te Papa Tongarewa.

He taonga tuku iho.

Kei te puritia e Te Papa  
tētahi kohinga kākahu  
motuhake i hangā mai  
ki te kiri o te kuri Māori  
kua korehāhā nei.

*I mōhio  
rānei  
koe?*



# Te Wahine Māori Tuatahi i Pāremata

## Panui 3

I tēnei wiki, i te wiki whakamutunga o Huitanguru, i ngā tau o mua, ka whānau mai a Iriaka Rātana. Ka pakeke mai ia, ā, ka tū ia hei wahine Māori tuatahi mō te Pāremata o Aotearoa.

I whānau mai a Iriaka i te tau 1905 i te awa o Whanganui. Nōna e tamariki ana ka rekareka ki a ia te waiata. Nō tōna huringa tau tekau mā ono ka hūnuku atu ia ki te Pā o Rātana ki reira noho ai. I a ia i reira, ka tū ia hei mema mō ngā kapa haka, nāwai rā ka tīmata tana karore haere i Aotearoa. Ka mau kē tōna wehi!

Images courtesy of Archives New Zealand Ref: AAMK W3495 21 21B



### Kupu Hou

**Hūnuku** – to move, shift.

**He neke, he nuku, he korikori.**

**Makau** – husband, wife, spouse.

**Ko te hoa rangatira a te tangata.**

**Kairīwhi** – successor.

**Ko tētahi ka kapi ake i te tūranga o tētahi atu.**

**Amuamu(tia)** – complain.

**He komekome te āhua o te kōrero.**



Image courtesy of Alexander Turnbull Library Ref: 1/2-055126; F

E rua ana mārenatanga, ā, ko tāna makau tuarua ko Matiu Rātana. I pōtihi a Matiu hei Mema Pāremata mō Te Tai Hauāuru i te tau 1945, ā, ka waiho mā Iriaka te pāmu kau me ngā tamariki e tiaki.

I hinga a Matiu i te tau 1949, ā, ka tū a Iriaka hei kairīwhi mōna. I nui te amuamutia o tā tētahi wahine tū hei Mema Pāremata, heoi, i kōwhiria tonutia ia, ka mutu, ko ia te wahine Māori tuatahi i tū hei Mema Pāremata!

I mōhio whānuitia a Iriaka hei wahine atawhai, hei wahine ngāwari hoki i runga i te āhua o tana kawe i a ia anō. He kaha tana hāpai i te iwi Māori, he kaha hoki tana kōkiri i ngā kaupapa mō te oranga tonutanga o te iwi Māori.

Ka heke ia i tana tūru i te tau 1969, nāwai rā ka whakawhiwhia ia ki te tohu ‘Āpiha o te Emapaea o Piritana’ (Officer of the Order of the British Empire) mō āna mahi hāpai i te iwi Māori.

Kei runga noa atu tēnei wahine toa!

# Ranginui Walker - He Rangatira



Image courtesy of NZ Herald

## Panui 4

I whānau mai tēnei rangatira nō te Whakatōhea i te 1 o Maehe, i te tau 1932, ā, i mate i te 29 o Pēpuere, i te tau 2016. He kaiako, he kaituhi pukapuka, he kairapu mātauranga, he pūkōrero, he mema nō te Taraipiunara o Waitangi, he kaituku kōrero, he kaiwhakahau hoki a Tākuta Ranginui Walker mō ngā take huhua e pā ana ki te Māori. I noho hoki ia hei tumuaki Māori tuatahi mō Te Whare Wānanga o Tāmaki Makaurau mō ngā tau e rua.

I rongonui te tipua nei mō tētahi o āna pukapuka, arā, mō te pukapuka ‘Ka Whawhai Tonu Mātou: Struggle Without End’. Koinei te pukapuka tuatahi i tuhia e te Māori mō te Māori, e pā ana ki te hītori o Aotearoa, ā, i tāngia tuatahitia i te tau 1990.

I tua atu i tēnei, i mōhio rānei koe ko ia tētahi o ngā mema o te rōpū ‘Ngā Tamatoa’? I hua mai tēnei rōpū i tētahi hui i whakaritea e ia mā ngā rangatahi Māori!

Kāore i ārikarika ngā mihi a te iwi Māori ki a Ranginui Walker, mōna i kōkiri i ngā kaupapa huhua hei oranga mō ngāi Māori. E te rangatira, ka maumaharatia koe mō āke tonu atu!

I riro i a Tākuta Ranginui Walker Te Tohu Tāpui i te tau 2001 mō āna mahi tautāwhi i a ngāi Māori, engari i whakanautia e ia Te Tohu Tā i te tau 2009.

*I mōhio  
rānei  
koe?*




Image courtesy of Penguin New Zealand

# Te Kara i Kororāreka!

Panui 5

## Te Kara i Kororāreka!

I te atatū, i te 11 o Māehe i te tau 1845, i whakaekaea te kāinga o Kororāreka e Hōne Heke rāua ko Te Ruki Kawiti. He rangatira rāua nō roto o Te Tai Tokerau.

Ahakoa i tutū te puehu i waenga i a Ngāpuhi me ngā hōia Pākehā i te 11 o Maehe, i tīmata tēnei riri i ngā tau tata i muri mai i te hainatanga o te tiriti i te tau 1840. I pukuriri haere te iwi o Ngāpuhi i ētahi o ngā mahi a te kāwanatanga, ka tahi; ka rua, kāore hoki a Ngāpuhi i rata ki ngā whakahaeenga mō te tāone o Kororāreka.

Ka takariri a Hōne Heke mā ki te whakatūnga o te kara mō Ingarangi, arā, o te ‘Tiaki o Ingarangi’ i Kororāreka. Ki a rātou, e tohu ana tēnei kara i te rironga atu o tō rātou tino rangatiratanga me tō rātou mana motuhake i raro i te Kuīni o Ingarangi, ā, kua noho kē rātau hei taurekareka mā te Kuīni. Kāore a Hōne Heke mā i whakaae, ka mutu, nā Hōne Heke te pou kara i whakatū kia rere kē ai te kara o ‘Te Whakaminenga o Ngā Hapū o Niu Tirenī’.

Nō reira, hei whakaatu i tōna matekiri ki te Karauna, ka topea te pou kara. I topea tuatahitia e Te Haratua i te tau 1844, ā, ka

### Kupu Hou

Tutū – to stand erect.

*He momo tū, he tū torotika.*

Takariri – outraged, to be angry.

*He pukuriri, kua puku te rae.*

Whakatūnga – wound.

*Kua whara, he taotū.*

Rironga – acquiring.

*Kua whiwhi, kua mau.*

Topenga – cross-section.

*He momo motuhanga, he tapahanga.*

Topea – cut down, chop, fell.

*Ka topea te rākau kia hinga ai.*

rua anō ngā topenga o te pou kara e Hōne Heke i te marama o Hānuere, i te tau 1845. I te ata o te 11 o Maehe, ka hoki anō a Hōne Heke ki te tope i te pou kara, ā, ka tīmata te riri i waenga i a Ngāpuhi me te Karauna. Nā konā i tīmata ai te pakanga o te Nōta, ka mutu, e kīia nei tēnei riri ko te ‘Flagstaff War’, ko te ‘Northern War’ rānei.

I te tau 1858, i whakatūria he pou kara anō i raro i ngā tohutohu a Maihi Parāone, te tama a Te Ruki Kawiti.

Ko ‘Whakakotahitanga’ te ingoa o tēnei kara.



# Te Haki o Te Whakaminenga o ngā Hapū o Niu Tīreni

## Panui 6

### He Meka

Ko tā te haki, he waitohu i te whenua, i te iwi, i te mana, i te rangatiratanga hoki o tētahi rōpū. I te nuinga o te wā, ka whakairia ngā haki ki tētahi pou.

### Ngā Kupu

**Te haki** - He whakarāpopotanga nō te kupu 'Tiaki o Ingarangi'.

**Te tae** - He whakamōhio atu i ngā tae o te rōpū.

### Ngā Haki Tōmua o Te Motu

I te tau 1830 ka ara ake te hiahia o te ngā kaipuke hokohoko o Aotearoa ki tētahi haki mō te motu. I taua wā, i te whakairia tētahi kaitaka (woven mat) ki te tira waka, heoi, kāore he mana o tērā haki ki ngā iwi o whenua kē.

I te 20 o Maehe i te tau 1834, ka pōwhiritia ngā rangatira o Ngāpuhi ki Waitangi. Ko te take i pōwhiritia ai rātou, ko te kōwhiri i tētahi haki hei whakatairanga i a rātou. E toru ngā kōwhiringa, ā, i te mutunga iho i kōwhiria te haki o Te Whakaminenga o ngā Hapū o Aotearoa.



Image courtesy of Alexander Turnbull Library Ref: 82-419-01

Ki te Kore tētahi kaipuke  
e whakaatu i tōna kara  
kia mōhio ai nō hea,  
ākene ka taumanutia  
te waka me ngā rawa.

I mōhio  
rānei  
koe?



Image courtesy of NZ Herald




Image courtesy of Wikipedia.

# Ngā Pī Mīere

Panui 7

Ahakoa e taketake ana ngā pī o Aotearoa ki tēnei whenua, he rerekē tonu ki ngā pī mīere o whenua kē. Ka noho kē ā tātou pī ki roto i te one o Papatūānuku, kaua ki rō whare pī, kāore hoki rātou e whakaputa mīere pērā i ētahi atu pī mīere.

Hei tā ngā kōrero, i mauria mai e tētahi wahine Pākehā ngā whare pī e rua ki Aotearoa i te 19 o Maehe, i te tau 1839, ka tau ai ki tētahi whare mīhana, ki Māngunu i te Hokianga-nui-a-Kupe. Nō muri ka mauria mai e tētahi tangata Wīwī ētahi atu whare pī ki te whanga o Ipipiri.

I rata ngā pī mīere ki te Wao Nui a Tāne, nāwai rā ka rea haere rātou i te rohe o Te Tai Tokerau, ā, pukahu ana te whakaputaina o te mīere.

Nā tēnei āhuatanga i noho ai ko te hokohoko mīere hei mahi matua mā ngā Māori o Te Tai Tokerau. Ko rātou ngā kaitiaki pī mīere tuatahi o Aotearoa.

Inā noa atu ngā pūkenga auaha o ō tātou tīpuna! “Nāu te rourou, nāku te rourou, ka ora ai te iwi.”

He pakupaku noa iho nei te mīere ka mahia e te pī kotahi i tōna tauoranga, me kī he pata iti nei i te tīpune.

I mōhio  
rānei  
koe?



Image courtesy of Wikipedia



Image courtesy of www.baybuzz.co.nz

Tēnei Wiki i Nehe

# E Mōhio Ana Rānei Koe ki te Whakapapa o Whakaata Māori?

Panui 8

Ehara i te mea he mea hou te mātakitaki i te pouaka whakaata, kua roa tātou e mahi ana i tērā mahi. Heoi, nō ngā tau 1980 ka tīmata te kitea o ētahi hōtaka reo Māori i te pouaka whakaata.

Ahakoa tēnei, i koni atu i te 20 tau te roa o te tohetohe i ngā kōti me te tuku kerēme ki te Taraipiunara o Waitangi, pēnei i te kerēme a Ngā Kaiwhakapūmau i te Reo, kia whakaaehia tētahi teihana motuhake e aro kau ana ki te ao Māori me te reo Māori.

Nāwai rā ka whakarewaina a Whakaata Māori i te 28 o Māehe, i te tau 2004. Ka hurō te nuinga o te iwi Māori i te rongo i te reo Māori e rere ana i te mata o te pouaka whakaata.


Ka ara ake he teihana tuarua i te tau 2008, ko Te Reo tōna ingoa, ā, ka whakapāhotia katoatia ki te reo Māori. I ēnei rā ka kotahi me te haurua miriona tāngata i te marama te tokomaha o ngā kaimātakitaki – koia tētahi hautoru o te taupori o Aotearoa!



E waimarie ana tātou ki te rongo i tō tātou reo taketake i te pouaka whakaata me te mātakitaki hoki i ngā hōtaka e whakaatu ana i ō te Māori whakaaro me ō te Māori kare ā-roto.

Kāore i tua atu i te mātakitaki i a SpongeBob Tarau Porowhā me Dora Mātātoa i roto i te reo Māori, nē?

Kia kaha te reo Māori!



## Kupu Hou

Tohetohe – argue, persist.

*He tautohetohe, he taukumekume.*

Kerēme – to claim.

*He kupu anō mō te kokoraho.*

Teihana – station, channel.

*He hongere i te pouaka whakaata.*

Kaimātakitaki – audience, spectator.

*Ko te hunga mātakitaki i te pouaka whakaata.*

Taupori – population.

*Ko te nui me te rahi ka mātakitaki i te pouaka whakaata.*

# Tēnei Wiki i Ngā Tau o Mua:

## Te Hokinga mai o Te Hokowhitu-a-Tū ki Aotearoa



Images courtesy of Tairawhiti Museum

### Panui 9

I tokomaha ake i te 2000 ngā tāne Māori i te rōpū o Te Hokowhitu-a-Tū i pakanga i te Pakanga Tuatahi o te Ao i ngā tau 1915 – 1918. I whā tau te roa o tā rātou noho tawhiti i ūrātou whānau me ūrātou hoa, ka mutu, he tokomaha tonu ērā kāore i hoki mai ki te kāinga.

Kāore i kotahi ngā whakaaro o te Māori mō te pakanga i te Pakanga Tuatahi o te Ao. He āhua maha tonu ērā kāore i whakaae ki te pakanga mā te Karauna, he nui nō te Karauna tūkino i te iwi Māori.

Ahakoa te kaha o te tautētete, i kaha hoki te tautokona o te kaupapa e te huhua o ngā tāne Māori, ā, i tuku rātou i ūrātou ingoa hei tūao.

I rawe ki a rātou te haere ki whenua kē, heoi, i rawe hoki te hoki mai ki Aotearoa. Hei tā ngā kōrero, i te kuhunga mai o te kaipuke ki te whanga i te ata o te 6 o Āpereira, i te tau 1919, i karangatia rātou e ngā tangi whakatūpato me ngā pēne e waiata ana! Kātahi ka pōhiritia rātou e te Pirimia me ngā rangatira o ngā iwi maha o te motu.

Hoki atu ki tō maunga kia purea koe e ngā hau o Tāwhirimātea.

E 2227 ngā Māori, e 458 ngā Tāngata Moutere i taki haere hei ope taua i te Pakanga Nui o te Ao Tuatahi.

*I mōhio  
rānei  
koe?*



Images courtesy of Alexander Turnbull Library Ref: 1/2-091150-F

AKO PANUKU  
*Inspiring Learning*

# Pū te Rongo

Tēnei Wiki i Nehe



Te Tāhuhu o  
te Mātauranga  
Ministry of Education



KIWI KIDS  
**NEWS**